


TEZAUUR LITURGIC

25 MAI

**ACATISTUL
SF. IERARH
INOCHENTIE
BORISOV,
ARHIEPISCOPUL
CHERSONULUI
II**



MOSCOVA, 2000



Акафист Святителю Иннокентию Херсонскому

Кондак 1

Избранниче возлюбленный Божия Матери, Святителю преславный и великий чудотворче, богомудре отче наш Иннокентие, прославляюще прославшаго тя Господа, пение похвальное ти дерзаем приносить. Ты же, яко великих дарований сподобивыйся, прими молитвы и моления чад твоих, любовью ти присно взывающих:

Радуйся, отче наш Иннокентие, святителю преславный и богомудрый.

Икос 1

Ангельския уста по достоянию возмогут воспети тя, Иннокентие преславне отче наш, мы же, земнороднии како дерзнем ти похвалу приносить. Обаче любовью побеждаеми, со благоговением ти глаголем:

Радуйся, пастырю наш добрый;

Радуйся, отче милостивый и кроткий;

Радуйся, правило веры и благочестия;

Радуйся, образе святости и смирения;

Радуйся, Святыя Троицы пречистое селение;

Радуйся, ангельскаго жития уподобление;
Радуйся, всесветлое благодати приятелище;
Радуйся, земли нашея чудное сокровище;
Радуйся, отче наш Иннокентие, святителю
преславный и богомудрый.

Кондак 2

Видяще родители твоя благочестивыя велия
дарования Господня, на тебе, святе отче,
обильно почившия, и проразумевающе тя быти
служителя дивнаго Церкви Христовыя,
возрадовашася духом и всех благих Подателю
Богу воспеша: Аллилуиа.

Икос 2

Разум Божественный взыскуя от юности твоея,
возлюбил еси стези Премудрости и путие
Заповедей Господних, на нихже сердце твое
право утвердивши, многим образ праведнаго
жития и благочестия был еси. Темже со
благоговением глаголем ти сице:

Радуйся, святое прозябение корене
благочестиваго;

Радуйся, дивный цвете вертограда
благоуханнаго;

Радуйся, праведных родителей отрасль
пречестная;

Радуйся, лозы многоплодные розго
богоизбраная;
Радуйся, от юности во благочестии
воспитанный;
Радуйся, на путь доброделания измлада
наставленный;
Радуйся, богослужение всем сердцем
возлюбивый;
Радуйся, райскую сладость в молитве
предвкусивый;
Радуйся отче наш Иннокентие, святителю
преславный и богомудрый.

Кондак 3

Силою свыше препоясани быша чресла ума
твоего, отче всеблаженне, егда востекл еси на
путь многотрудный учения, хотяще воистину
сыном Премудрости явиться и Учителя
Божественнаго последователем быти.
Благодатию же Божию в подвизе сем добре
преуспевающе, Господу, ти присно
поспешествующу, воспевал еси: Аллилуиа.

Икос 3

Имуше богатство дарований, излианных на тя
обильно от щедрот Господних, яко раб благий и
верный преумножил еси богоданныя таланты, да
явишия неленостный и всеусердный делатель

Вертограда Божия. Сего ради, прославляюще тя, премудрости сокровище неисчерпаемое, вопием ти сице:

Радуйся, Божиих дарований исполненный;

Радуйся, благодатию Господнею осененный;

Радуйся, суемудрие отринувый;

Радуйся, богомудрие возлюбивый;

Радуйся, небеснаго знания возжелавый;

Радуйся, божественныя мудрости взыскавый;

Радуйся, богословов древних учениче прехвальный;

Радуйся, вселенских учителей последователю усердный;

Радуйся, отче наш Иннокентие, святителю преславный и богомудрый.

Кондак 4

Бурею искушений волнуемое и соблазнов море жития мирскаго не прельстиша тя, отче всеблаженне Иннокентие. Оставивше бо ризы кожанныя тли века сего, равноангельскаго жития взыскующе, во одежду многосветлую чина монашескаго облекся еси да выну Господу зовещи: Аллилуа

Икос 4

Слышати потшался еси сердцем твоим
ангельския гласы неизреченныя, Павлу

небошественному ревнуя, ихже не леть есть глаголати усты земнородными, вперил еси ум твой вышним, и ангельски пожив на земли, на высоту бестрастия возшел еси, да с лики небесными песнь Творцу всяческих воспоеши. Темже приими от нас похвалы сия:

Радуйся, ангельских ликом собеседниче;

Радуйся, иноческих соборов наставниче;

Радуйся, путь тесный жития монашескаго избравый;

Радуйся, вся красная мира сего во уметы вменивый;

Радуйся, плотския страсти поправый;

Радуйся, добродетельми душу свою украсивый;

Радуйся, броней правды облеченый;

Радуйся, венцем целомудрия увенчанный;

Радуйся, отче наш Иннокентие, святителю преславный и богомудрый.

Кондак 5

Божественным светом несозданным осияна быша душа твоя, отче всеблаженне, егда на Фаворскую гору молитвы сердечныя восхождение подъял еси, апостолом избранным последствуя, и сподобился еси умными очесы славу превечную Господа твоего Творца зрети и сладость вкусити богопредстояния, радостию взывающе: Аллилуиа.

Икос 5

Видев Сердцевидец Господь ты, отче наш
Иннокентие, всяческих добродетелей
исполненна, яко преславный светильник на
свещнице высокой служения архипастырского
постави ты, да сияеши ученьми твоими всем в
Дому Божии сущим. Людие же православнии,
зряще ты пастыря добраго и отца милостиваго,
со умилением взываху ти:

Радуйся, святителю наш богоизбранный;

Радуйся, архипастырю богодарованный;

Радуйся, апостольских престолов сонаследниче;

Радуйся, отеческих соборов сотаинниче;

Радуйся, благое иго Христово на рамена своя
подъявый;

Радуйся, святительского служения крест от
Господа приявый;

Радуйся, яко тобою истина возвещается;

Радуйся, яко тобою всякая лесьть отгоняется;

Радуйся, отче наш Иннокентие, святителю
преславный и богомудрый.

Кондак 6

Проповедник Евангелия вечнаго воистину
явился еси неленностный, делателю
непостыдный, право правящий слово Истины,
Иннокентие отче наш. Огненными бо твоими
словесы, ревностию по Бозе Вседержители

распаленными, возжег еси пламя любви и веры в сердцах паствы твоея, поучая всех непрестанно Господу взывати: Аллилуиа.

Икос 6

Возсиял еси яко светило многосветлое, небо Церкви Русския лучами животочными исполняющее и верных души освещающее, денно бо и ночью неустанно трудился еси, о пользе духовней паствы твоея непрестанно помышляюще, сего ради сие ты воспеваху чада твоя:

Радуйся, спасения многих взыскавый;

Радуйся, вся любовьию объявый.

Радуйся, крепкое падающих возведение;

Радуйся, право стоящим утверждение.

Радуйся, Архиеерея вечнаго служителю всеусердный;

Радуйся, Небеснаго Домовладыки рабе благий и верный.

Радуйся, жатвы Господней делателю неленостный;

Радуйся, о людех православных молитвенниче предивный.

Радуйся, отче наш Иннокентие, святителю преславный и богомудрый.

Кондак 7

Хотением восхотел еси Града Вечнаго достигнути, емуже Художник и Создатель Бог, и посреде мира сего жительствуя, отбежал еси тленныя суеты земныя, отложще всякое многопопечение вселукавое и покаянием убелил еси ризы своя, да видиши в Небесный Чертог Господа Твоего, радостию поюще: Аллилуиа.

Икос 7

Новаго тя Моисея амаликоборца яви пастве твоей Господь, в молитве пламенной руце своя преподобныя воздевающаго и мечем веры дерзость вражескую побеждающаго и град Одессу от погибели избавляющаго предстательством своим. Темже, избегше напастей лютых, песнь ти приносим похвальную:

Радуйся, преславное наше избавление;

Радуйся, вражеския злобы посрамление.

Радуйся, всесветлое Одессы похваление.

Радуйся, всея земли наша заступление.

Радуйся, Отечества земнаго верный сыне;

Радуйся, Небеснаго Иерусалима преславный гражданин.

Радуйся, Взбранной Воеводы верный служителю.

Радуйся, небесных чинов сожителю;

Радуйся, отче наш Иннокентие, святителю преславный и богомудрый.

Кондак 8

Странная суемудрствующим мудрецам века сего и всечудная тебе, отче святыи, явленна бысть премудрость воистину небесная, зане всем житием твоим Премудрости Ипостастной служити восхотел еси и Тоя стяжам невозвратно последовал еси, радостию зывающе: Аллилуиа

Икос 8

Весь всем воистину вся был еси, отче Иннокентие, да некия паки Господу приобрящещи и ко Христовой Церкви приведещи. Сего ради труды и подвиги твоими Церковь похваляется светло и людие православнии, милостиваго тя святителя песньми ублажают:

Радуйся, Церкви Хистовыя столпе непоколебимый;

Радуйся, Православия светильниче неугосимый.

Радуйся, златокованная труба богословия;

Радуйся, неумомимый проповедниче спасения;

Радуйся, души наша Словом Божиим просветивый;

Радуйся, сердца наша питием благочестия напоивый.

Радуйся, неисчерпаемый премудрости
источниче;

Радуйся, Вечного Евангелия всехвальный
благовестниче.

Радуйся, отче наш Иннокентие, святителю
преславный и богомудрый.

Кондак 9

Всякия добродетели вместилище всечестное
явился еси, отче богомудре Иннокентие, образ
являюще жития праведнаго и всечестнаго, да
подвигом твоим последствуя, сподобимся с
тобою песнь неосужденно взывати Богу:
Аллилуиа.

Икос 9

Витийствовати всеизрядно не от человек научен
был еси, отче всечестне, земли нашея новый
Златоусте, но Духом Божественным просвещен,
якоже и иногда святии Божии человецы,
показал еси нам путь ко Господу, Сего ради сиче
вопием ти:

Радуйся, путь ко спасению нам возвестивый;

Радуйся, многия ко Христу возвративый.

Радуйся, яко тобою Евангелие прияхом;

Радуйся, яко тобою истины веры познахом.

Радуйся, всесветлое лести попрание;

Радуйся, всемогущее ересей посрамление.

Радуйся, неверия грозный обличителю;
Радуйся, Тайн Божиих верный служителю.
Радуйся, отче наш Иннокентие, святителю
преславный и богомудрый.

Кондак 10

Спасения нашего врага, человекоубийцы
диавола немощныя дерзости посрамлены о тебе
быша, отче Иннокентие, жезлом бо твоим
святительским волки душевредныя далече от
стада церковнаго отгнал еси, да чада, яже ти
Господь подаде с тобою песнь победную поют:
Аллилуиа.

Икос 10

Стеною молитв твоих, отче преславне,
ограждены есмы от всякаго всегубительнаго
прилога вражия, сего ради, тобою нам чудеса
явленныя поминающе похвалы тя достожджно
ублажаем:

Радуйся, вселукавых духов прогонителю;
Радуйся, козней диавольских победителю.
Радуйся, яко тобою от напастей избавляемся.
Радуйся, яко тобою благодати сподобляемся;
Радуйся, яко предстательством твоим жизнь
вечная обретается;
Радуйся, яко молитвами твоими вера истинная
познавается.

Радуйся, многия от смерти лютыя свободивый;;
Радуйся, от греховных язв ны исцеливый.
Радуйся, отче наш Иннокентие, святителю
преславный и богомудрый.

Кондак 11

Пение боголепное уст твоих, песнотворче
изрядный, приял есть Господь Вседержитель,
аще и песнословят Его тысячи Ангелов и тмы
бесчисленные умных сил небесных, с ними же
ныне молися мир подати всем, верою зовущим:
Аллилуиа.

Икос 11

Светозарное Правды Солнце Христос Бог наш
сущим во тме греховней дивное светило великое
яви тя , отче всеблаженне, светом благодати
Божия сияющее и путь доброделания всем
освещающее, сего ради молимся: просвети
сердца наша, страстьми омраченныя, да
сподобимся пети ти:

Радуйся, Светом Невечерним озаренный;

Радуйся, Славою Божией просвещенный.

Радуйся, мглы неверия отгонителю;

Радуйся, лживыя неправды потребителю.

Радуйся, радуйся всякия правды исполненный;

Радуйся, добродетельми светло преукрашенный.

Радуйся, любовью твоею всему миру возсиявый;

Радуйся, добродетельным житием вся облиставый.

Радуйся, отче наш Иннокентие, святителю преславный и богомудрый.

Кондак 12

Благодати источниче приснотекущий, воды животочныя кладезю неисчерпаемый, преславне отче и всеблаженне, благодать нам у Господа испроси, да стопам твоим последствуя, сподобимся с тобою и со всеми святыми в невечернем дни Царствия Христова воспевати: Аллилуиа.

Икос 12

Поюще Бога, дивнаго во святых Своих, похвалы всяческая приносим ти, отче наш Иннокентие, молитвенниче о нас усердный и заступниче наш всечудный, и единым сердцем величаем тя, глаголюще:

Радуйся, причастниче вечныя радости;

Радуйся, приятелище божественныя сладости.

Радуйся, преславное верных величание;

Радуйся, православных крепкое упование.

Радуйся, ангельское житие явивый;

Радуйся, проповедию мир просветивый.

Радуйся, правды дивное благоухание;

Радуйся, святости чудное сияние.

Радуйся, отче наш Иннокентие, святителю преславный и богомудрый.

Кондак 13

О предивный угодниче Христов, Святителю отче Иннокентие, прими немощное пение сие от любви нашей возсылаемое ти, и Моли Господа и Владыку всяческих избавити нас душевреднаго прилога вражiego, да спасение вечное улучивше, песнь с тобою боголепно воспоим: Аллилуиа, аллилуиа, аллилуиа.

